



# SLUŽBENE NOVINE GRADA ZENICA

GODINA XLII  
Broj 5

Srijeda, 22.06.2016.

ISSN 1840-4588

## GRADSKO VIJEĆE

44.

Na osnovu člana 48. tačka (5) Zakona o prostornom uređenju i građenju („Službene novine Zeničko-dobojskog kantona“, broj 1/14) i člana 21. tačka 5. Statuta Grada Zenica („Sl. novine Grada Zenica“, broj 5/15) Gradsko vijeće Zenica na 16. sjednici održanoj 16. juna 2016. godine, donosi

### ODLUKU O USVAJANJU IZMJENE REGULACIONOG PLANA „MOKUŠNICE“

#### Član 1.

Usvaja se izmjena Regulacionog plana „Mokušnice“ u tekstualnom dijelu i grafičkim priložima izrađenim od strane Javnog preduzeća za prostorno planiranje i uređenje grada „Zenica“ d.o.o. Zenica (u daljem tekstu Regulacioni plan).

#### Član 2.

Regulacioni plan je izrađen u analognom i digitalnom obliku i sadrži:

##### I/ Tekstualni dio:

- Izvod iz urbanističke osnove
- Projekcija izgradnje i uređenja prostora
- Odluka o provođenju plana

##### II/ Grafički dio:

- izvod iz Prostornog plana Zeničko-dobojskog kantona
- izvod iz Urbanističkog plana grada Zenica
- granica obuhvata Izmjena Regulacionog plana „Mokušnice“ (ortophoto)
- postojeća parcelacija
- postojeće stanje (namjena površina)
- postojeće stanje (bonitet objekata)
- sintezna karta infrastrukture (planirana)

- planirana namjena površina sa zonama
- urbanističko rješenje
- planirana parcelacija
- saobraćajno rješenje
- regulacione i građevinske linije

#### Član 3.

Evidencija planskih dokumenata iz nadležnosti Grada Zenica uspostavljena je u Službi za prostorno uređenje Grada Zenica.

#### Član 4.

Original dokumenta prostornog uređenja – regulacionog plana u analognom obliku, kojeg je donijelo Gradsko vijeće Zenica i potpisao predsjedavajući, čuva se u arhivi Gradskog vijeća Zenica i arhivi Nosioca pripreme.

Sastavni dio originalnog dokumenta je Odluka o usvajanju Regulacionog plana.

Jedan primjerak Regulacionog plana, u analognom i digitalnom obliku, nalazi se na stalnom javnom uvidu u Službi za prostorno uređenje Grada Zenica.

Jedan primjerak Regulacionog plana, u analognom i digitalnom obliku, nalazi se i čuva u arhivi Službe za prostorno uređenje Grada Zenica.

Jedan primjerak Regulacionog plana, u analognom i digitalnom obliku, nalazi se i čuva u arhivi Javnog preduzeća za prostorno planiranje i uređenje grada „Zenica“ d.o.o. Zenica.

#### Član 5.

Izgradnju objekata i uređenje površina na lokalitetu obuhvaćenom ovim Planom vršiće se uz prethodno pribavljanje urbanističke saglasnosti, odobrenja za građenje za svaki objekat po zahtjevu Investitora, a u skladu sa odredbama Plana i Odluke o provođenju Regulacionog plana.

**Član 6.**

Ova odluka stupa na snagu osmog dana od dana objavljivanja u „Službenim novinama Grada Zenica“.

Broj: 01-23-12940/16

Zenica, 16.06.2016. godine

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

**45.**

Na osnovu člana 27. tačka (5) Zakona o prostornom uređenju i građenju („Službene novine Zeničko-dobojskog kantona“, broj 1/14 ) i člana 21. tačka 5. Statuta Grada Zenica („Službene novine Grada Zenica“, broj 5/15) Gradsko vijeće Zenica na 16. sjednici održanoj 16. juna 2016. godine, donosi

**ODLUKU****O PROVOĐENJU REGULACIONOG  
PLANA „MOKUŠNICE“****I / UVODNE ODREDBE****Član 1.**

Ovom Odlukom utvrđuje se provođenje Regulacionog plana “Mokušnice” (u daljnjem tekstu: Plan), a naročito: granice prostorne cjeline, namjene površina, urbanističko-tehnički uslovi za izgradnju građevina i uređenja gradskog zemljišta, mjere zaštite stanovnika i materijalnih dobara od prirodnih i ljudskim djelovanjem izazvanih nepogoda, mjere zaštite prava lica sa smanjenim tjelesnim sposobnostima, uslovi uređenja zelenih i slobodnih površina, odnosi prema postojećim objektima, te način i postupak za njegovo provođenje.

**Član 2.**

Plan je provedbeni dokument koji se sastoji iz tekstualnog i grafičkog dijela sa sljedećim sadržajem:

**I/ TEKSTUALNI DIO:**

- A) Izvod iz urbanističke osnove,
- B) Projekcija izgradnje i uređenja prostora,
- C) Odluka o provođenju plana.

**II/ GRAFIČKI DIO:**

- 1. Izvod iz Prostornog plana Zeničko-dobojskog kantona 1:50000
- 2. Izvod iz Urbanističkog plana grada Zenica 1:5000
- 3. Granica obuhvata Izmjena Regulacionog plana “Mokušnice” (ortophoto) 1:1000
- 4. Postojeća parcelacija 1:1000
- 5. Postojeće stanje (namjena površina) 1:1000
- 6. Postojeće stanje (bonitet objekata) 1:1000
- 7. Sintezna karta infrastrukture (planirana) 1:1000
- 8. Planirana namjena površina sa zonama 1:1000
- 9. Urbanističko rješenje 1:1000
- 10. Planirana parcelacija 1:1000
- 11. Saobraćajno rješenje 1:1000
- 12. Regulacione i građevinske linije 1:1000

**Član 3.**

Na obuhvatnom području Plana, od momenta stupanja na snagu, zabranjuju se sve radnje koje su u suprotnosti sa Planom.

**Član 4.**

Provođenje Plana vrši se putem urbanističke saglasnosti koju izdaje Služba za prostorno uređenje Grada Zenice.

Urbanistička saglasnost izdaje se na osnovu Plana za svaki objekat i sadržaj za koji se planira izgradnja, a utvrđuje se urbanističko-tehničkim uslovima u sastavu urbanističke saglasnosti.

Urbanistička saglasnost se izdaje za cijelu građevinsku parcelu utvrđenu ovim Planom (prema planu parcelacije), ili za dio građevinske parcele koji svojom izgradnjom predstavlja građevinsku cjelinu.

Urbanistička saglasnost se izdaje sa karakterom stalnog trajanja.

Izuzetno se može dati sa karakterom privremenog trajanja i to za sadržaje i objekte propisane važećim Zakonom.

Gradski organ uprave nadležan za poslove prostornog uređenja dužan je da odbije sve zahtjeve za izdavanje urbanističke saglasnosti, koji nisu u skladu sa ovim Planom.

**Član 5.**

U toku provođenja plana ne mogu se vršiti bitne izmjene Plana, kao što su namjena površina, spratnost planiranih objekata, osnovne saobraćajnice, smanjenje širine saobraćajnica i smanjenje kapaciteta infrastrukturne mreže, graditi van građevinske linije, odnosno ne može se mijenjati osnovna koncepcija Plana.

Mogu se vršiti odstupanja u odnosu na postojeće gabarite objekata (dogradnja i nadogradnja) unutar građevinske linije utvrđene Planom u skladu sa članom 9., 10., 12. i 14. ove Odluke.

## II / GRANICA REGULACIONOG PLANA

### Član 6.

Granica obuhvata Plana polazi od granice parcele k.č. 1897 i mosta na rijeci Kočevi sa koordinatama  $x=492755.3033$ ,  $y=4894858,7443$ , ide uz jugozapadnu granicu k.č. 1897, k.č. 1889, k.č. 1894/2, nastavlja granicom k.č. 1941, siječe k.č. 1945 do tačke na granicama k.č. 2121, nastavlja ka jugoistoku granicom iste parcele, obuhvata k.č. 3472/1 i k.č. 3473/1 do puta k.č. 4231, ide uz istu granicu do granice k.č. 3474, obuhvatajući je sa tri strane, nastavlja granicom k.č. 3486, siječe k.č. 4229 (Ul. Štrosmajerova), nastavlja se južnom granicom parcele k.č. 3723, dijelom zapadne granice k.č. 3733, skreće prema sjeveroistoku i siječe k.č. 3729, k.č. 3732, ide istočnom granicom k.č. 1395, dalje ide granicom parcele k.č. 3731 i k.č. 1389 ulicom Armije BiH do ulice Sarajevska (sada GGM), skreće ka zapadu sredinom GGM-a do tačke na sjevernoj granici parcele iste saobraćajnice, skreće ka zapadu i ide sjevernim granicama parcela k.č. 1900, k.č. 1899 i k.č. 1897 dolazeći do početne tačke.

Sve navedene parcele se nalaze u K.O. Zenica II.

Ukupna površina obuhvatu Plana iznosi 14,03 ha.

## III / URBANISTIČKO-TEHNIČKI USLOVI ZA IZGRADNJU GRAĐEVINA

### Član 7.

Urbanističkom saglasnošću za izgradnju objekata, grupe objekata ili cjelovitih kompleksa, kao i sadržaja u naselju, utvrđuju se urbanističko-tehnički uslovi u skladu sa ovim Planom.

Izgradnja objekata, grupe objekata ili cjelovitih kompleksa, vršenje građevinskih i drugih radova na površini i ispod površine zemlje, kao i promjena namjene objekata ili zemljišta, sječa ili sadnja stabala, postavljanje stubova, reklama, odvođenje i ispuštanje otpadnih voda, svako nadziđivanje i doziđivanje, svaka konstruktivna rekonstrukcija i adaptacija koja ne spada u redovno održavanje objekata, te postavljanje ograda, potpornih zidova i dr., utvrđuje se urbanističko-tehničkim uslovima u sastavu urbanističke saglasnosti.

Urbanističko - tehnički uslovi se sastoje od tekstualnog i grafičkog dijela.

### Član 8.

#### (namjena površina i objekata)

Prostornom organizacijom Plana "Mokušnice" utvrđeno je više zasebnih samostalnih prostornih cjelina koje trebaju predstavljati jedinstveni prostor, koji je sastavni dio gradskog centra.

Utvrđene zone namjene površina su:

- zona kolektivnog stanovanja;
- zona individualnog stanovanja;

- stambeno-poslovna zona;
- zona sakralnih objekata;
- zona školstva;
- zelene površine.

U granici Plana svi postojeći i planirani objekti razvrstani su po slijedećim namjenama:

- stambena;
- stambeno-poslovna;
- poslovna;
- kompleks sa sakralnim objektima;
- školstvo;
- ostali prateći infrastrukturni objekti (TS, podstanice i sl.).

Izuzetno od planirane namjene, dozvoljava se promjena namjene objekata uz prethodno propisane uslove izdate od nadležne Službe.

*Namjena površina prikazana je na grafičkom prilogu broj 8. – "Planirana namjena površina sa zonama".*

### Član 9.

#### (spratnost)

Spratnost objekata definirana je na osnovu utvrđene površine građevinske parcele, gabarita saobraćajnica i u odnosu na položaj susjednih objekata.

U granicama obuhvata Plana zadržani su individualni objekti, spratnosti P i P+1 (Ulica Zukići i Ulica Štrosmajerova), te objekti kolektivnog stanovanja, spratnosti P+1 (Ulica Hasana Muminagića), za koje su izdate urbanističke saglasnosti od strane nadležne Službe, te gdje god urbanističko- tehnički uvjeti dozvoljavaju spratnost objekata može se povećati za po jednu etažu, odnosno max. spratnosti P+1+Pk.

Novoprojektovani dvojni stambeni objekat na parceli k.č.3730 ima spratnost Po+P+4+Pk, uz uslov da se u podrumskoj etaži formira garažni prostor.

Na parcelama k.č 1395 i k.č.1393 umjesto postojećih objekata spratnosti P+2 i P+Pk, predviđeni su objekti spratnosti Po+P+4+Pk, uz uslov da se u podrumskoj etaži formira garažni prostor.

Ukoliko dođe do ukрупnjavanja individualnih parcela uz ulicu Štrosmajerova i ukoliko urbanističko - tehnički uvjeti dozvoljavaju, spratnost objekta može se povećati za jednu etažu, odnosno max. spratnosti P+2+Pk (ukoliko je objekat sa kosim krovom) ili P+3 (ukoliko je objekat sa ravnim krovom), poštujući građevinsku liniju prema ulici Štrosmajerova koja je data Planom.

Stambeno-poslovni objekti i stambeni objekti uz ulicu Sarajevska (GGM) spajanjem, odnosno ukрупnjavanjem parcela (min. 3 individualne parcele), ukoliko urbanističko-tehnički uvjeti dozvoljavaju, mogu imati max. spratnost objekta Po+P+4, poštujući građevinsku liniju prema ulici Sarajevska (GGM), koja je data Planom.

*Spratnost objekata prikazana je na grafičkom prilogu broj 9. - "Urbanističko rješenje".*

**Član 10.****(položaj i gabariti objekata)**

Prikaz položaja i gabarita svih objekata, koji se ovim Planom zadržavaju i na kojima se mogu vršiti građevinske intervencije (rekonstrukcije, dogradnje, nadogradnje ili adaptacije), kao i novi objekti čija se izgradnja planira, dat je na grafičkom prilogu **br. 9. – “Urbanističko rješenje”**.

Postojeći objekti koji se Planom zadržavaju u postojećem stanju ne isključuju mogućnost njihove rekonstrukcije tj. dogradnje ili nadogradnje (ukoliko se ukaže potreba), uz uslov poštivanja planiranih građevinskih linija i vertikalnih gabarita utvrđenih ovim Regulacionim planom, udaljenosti od granica susjednih parcela i susjednih objekata, kao i uz uslov poštivanja maksimalno dozvoljene spratnosti.

Dogradnja postojećih objekata se ne može planirati ukoliko je na susjednoj parceli postojeći objekat izgrađen na međi i isti ima legalne otvore prema parceli na kojoj se traži dogradnja, kako se ne bi zatvorili otvori i ugrozio postojeći objekat na susjednoj parceli, što će se utvrđivati u postupku izdavanja urbanističke saglasnosti.

Planirani objekti su u Planu utvrđeni orijentacionim oblikom, površinom i položajem „markice“ sa maksimalnom spratnošću. Za ove objekte u postupku izrade urbanističko-tehničkih uslova moguća su odstupanja u odnosu na predloženu „markicu“ objekta u zavisnosti od lokacijskih uslova i ukazanih potreba, a u skladu sa ostalim odredbama ove Odluke: poštivanje utvrđenih građevinskih linija, propisanih udaljenosti od granice parcele i susjednih objekata, te poštivanje maksimalno utvrđene spratnosti.

**Član 11.****(plan parcelacije)**

Plan parcelacije je urađen na osnovu urbanističkog rješenja, kojim se maksimalno nastojalo poštivati privatno vlasništvo i granice postojećih parcela.

Za pojedine novoplanirane objekte utvrđene su nove jedinstvene građevinske parcele u skladu sa urbanističkim rješenjem.

Planirane građevinske parcele za izgradnju objekata, ovisno o potrebi i mogućnostima se mogu udruživati i formirati veće građevinske parcele ili se dijeliti na manje građevinske parcele, pri čemu se ne može remetiti planirani saobraćajni koncept i utvrđena distanca građevinskih linija u odnosu na saobraćajnice i susjedne objekte.

Parcelacija se vrši na osnovu urbanističko-tehničkih uslova, koji će se zasebno davati za svaki objekat ili građevinski kompleks, u skladu sa načelnim postavkama Plana (planirana parcelacija), stanju i uslovima na terenu, usklađeno sa granicama postojećih katastarskih parcela.

**Plan parcelacije prikazan je na grafičkom prilogu broj 10. – “Planirana parcelacija”.**

**Član 12.****(regulacione i građevinske linije)**

Regulacionom linijom utvrđuju se pojedinačne građevinske parcele. Regulacionom linijom odvajaju se javne površine (saobraćajne, zelene površine, vodene površine, ostale infrastrukturne površine) od površina namjenjenih za izgradnju (građevinske parcele).

Ovim Regulacionim planom utvrđene su regulacione linije za građevinske parcele namjenjene izgradnji jednog ili grupe objekata, ovisno od potreba investitora mogu se cjepati ili objedinjavati.

Za svaki pojedinačni objekat utvrđuje se građevinska linija objekta koja se odnosi na liniju iskolčenja prizemlja objekta.

U nekim slučajevima građevinska linija poklapa se sa regulacionom linijom.

Građevinska linija utvrđuje dio građevinske parcele na kojoj je moguće izgraditi građevinu. Građevinskom linijom je utvrđena udaljenost objekta od regulacione linije i pravac pružanja uličnog pročelja. Građevinska linija ne može prelaziti regulacionu liniju. Unutar građevinskih linija investitor je slobodan da definiše tlocrt građevina u zavisnosti od potreba i želja.

Građevinska linija podrumске etaže može biti i veća od građevinske linije osnovnog gabarita objekta (ali ne i od regulacione linije), ali samo na dijelu koji je cijelom površinom ukopan u odnosu na uređeni teren. Udaljenost građevinske linije podruma u odnosu na susjednu parcelu je minimalno 1,0 m uz obaveznu izradu projekta osiguranja građevinske jame. Kod realizacije navedene podrumске etaže voditi računa da se ne ugrozi stabilnost objekata na susjednim parcelama;

Preko građevinske linije prizemlja, tamo gdje je to moguće, mogu prelaziti spratne etaže sa svim fasadnim i krovnim istacima max. 1,5m.

Minimalno odstojanje najjisturenijih dijelova planiranih slobodnostojećih objekata od granice susjedne parcele iznosi 3,0m, ukoliko objekat ima otvore prema susjednoj parceli, ili 1,0m ukoliko planirani objekat ima manje ventilacione otvore prema susjednoj parceli.

Objekti se mogu graditi na međi ukoliko je planiran građevinski niz (blok) ili ako objekti nemaju otvore prema susjednoj parceli.

Izuzetno, građevinske linije planiranih objekata prema granicama susjednih građevinskih parcela i izgrađenim susjednim objektima mogu se utvrditi i drugačije u zavisnosti od zatečenog stanja, postojećih i planiranih fasadnih otvora ili dogovora vlasnika susjednih parcela, što se reguliše davanjem pismene saglasnosti u postupku izdavanja urbanističke saglasnosti ovjerenih od nadležnih organa i uz uslov poštivanja planskih odrednica ovoga Regulacionog plana.

**Svi elementi definiranja građevinske i regulacione linije prikazani su na grafičkom prilogu broj 12. - “Regulacione i građevinske linije”.**



### Član 13. (nivelacija)

Rješenje nivelacije dato je kroz planiranu mrežu saobraćajnica čije su nivelete usklađene sa niveletama terena.

Nivelacioni elementi za svaki planirani objekat (poslovni, poslovno-stambeni i dr.) i okolno uređenje odredit će se pojedinačno u postupku izdavanja urbanističke saglasnosti, odnosno kroz izradu urbanističko – tehničkih uslova.

*Regulaciono-nivelacioni elementi su prikazani na grafičkom prilogu broj 11. - "Saobraćajno rješenje".*

### Član 14. (arhitektonsko oblikovanje objekata)

Arhitektonsko oblikovanje objekata predstavlja ne samo estetsku kategoriju u oblikovanju prostora, već i odrednicu po kojoj se identifikuje život, rad i odmor stanovnika tog prostora.

S obzirom na usitnjene postojeće parcele, oblikovanju objekata treba posvetiti naročitu pažnju, uz uvažavanje postojećih izgrađenih objekata koji su zadržani Regulacionim planom.

Prilikom oblikovanja i odabira konstrukcije objekata neophodno je voditi računa o namjeni objekata, planiranoj spratnosti, klimatskim, terenskim i drugim uslovima.

Planom se utvrđuju osnovni principi za oblikovanje naselja, odnosno pojedinačnih objekata:

- svi objekti i sadržaji trebaju se locirati na prostorima na kojima su predviđeni na osnovu orjentaciono datih gabarita i planirane spratnosti;
- kod grupacije objekata društvene izgradnje potrebno je omogućiti da svaki objekat ili grupa objekata, predviđenih za određenu namjenu dobiju svoj individualni pečat;
- kod grupacije objekata individualne izgradnje predviđeti ravnomjerniju i smireniju strukturu oblikovanja;
- predviđena spratnost objekata treba da se poštuje, s tim da se kod objekata sa kosim krovom, tamo gdje se ne remeti ambijentalna cjelina može odobriti potkrovnetaža, čija je max. visina nadzītka 1,60 m.
- pojedine grupacije objekata (u zavisnosti od namjene) moraju da dobiju u vanjskom izgledu zajedničku oblikovnu karakteristiku, što će se postići izborom materijala i istovjetnim arhitektonskim elementima;
- postojeći objekti koji se zadržavaju moraju se uskladiti u oblikovnom (vanjskom) smislu sa izgledom novih objekata što će se postići rekonstrukcijom i adaptacijom ili izgradnjom novog objekta na postojećoj lokaciji u datim okvirima Plana.

Obavezno je planiranje parkiranja unutar građevinskog bloka, odnosno u sklopu pripadajuće parcele sa izgradnjom garaža ili parking prostora.

### Član 15. (uređenje zelenila i slobodnih površina)

Uređenje javnih zelenih i slobodnih površina podrazumijeva podizanje i održavanje visokog i niskog rastinja, uređenje i opremanje dječijih i privremenih igrališta sa mobilijarom (klupe, klackalice, ljuljačke, tobogani, pješćanici i dr.), uređenje pješćakih staza, trgova, uređenje slobodnih pješćakih površina u okviru poslovnih parcela (popločanja, travnjaci, cvjetnjaci, fontane, klupe, svjetiljke, korpe, žardinjere i sl.).

Uređenje površina iz prethodnog stava vrši se na osnovu projekta uređenja.

Uređenje dvorišta uz individualne stambene objekte podrazumijeva podizanje i održavanje visokog drveća i drugih žbunastih i cvjetnih vrsta. Posebnu pažnju treba posvetiti dvorištima koja su locirana uz postojeće ili planirane saobraćajnice kod sadnje visokog drveća, kako njihova stabla ne bi uticala na smanjenje vidljivosti saobraćaja i ugrožavala kretanje vozila i pješćaka.

### Član 16. (postavljanje ograda)

Na području Regulacionog plana nije dozvoljeno trajno postavljanje ograda, osim na lokalitetu škole, obdaništa i crkve.

Za privatne građevinske parcele sa individualnim stambenim objektima, koje graniče sa ulicom mogu se postaviti prozračne (metalne i sl.) ograde max. visine  $h_{max}=120\text{cm}$ , dok ograde između susjeda mogu biti i zidane iste visine kao i prema ulici, a detaljni uslovi za njihovo postavljanje će se definisati u postupku izdavanja urbanističke saglasnosti.

## IV / ODNOS PREMA POSTOJEĆIM OBJEKTIMA

### Član 17.

Na postojećim objektima, koji nisu u skladu sa osnovnim postavkama Plana, mogu se vršiti samo radovi tekućeg održavanja (zahvati u cilju poboljšanja uslova stanovanja ne mijenjajući postojeće gabarite).

### Član 18.

Na postojećim objektima koji se ovim Planom zadržavaju može se izvoditi rekonstrukcija, dogradnja ili nadziđivanje.

Rekonstrukcija, dogradnja ili nadziđivanje postojećih objekata moguće je samo pod slijedećim uslovima:

- Dogradnja ne smije da pogoršava uvjete stanovanja i rada u susjednim objektima;
- Objekti koji se nadziđuju treba da zadovolje konstruktivno seizmičke uslove;
- Maksimalna spratnost je utvrđena članom 9. ove Odluke.

**Član 19.**

Naknadna urbanistička saglasnost i odobrenje za građenje može se izdati za započete i sagrađene objekte, koji su u skladu sa urbanističkim rješenjem Regulacionog plana.

**V/ USLOVI ZA IZGRADNJU PRIVREMENIH OBJEKATA****Član 20.**

Privremenim objektima u smislu ove Odluke smatraju se građevinski objekti izgrađeni ili postavljeni na privremeno određenoj lokaciji za potrebe gradilišta i za primjenu određene tehnologije građenja, kao i građevinski objekti za privremene namjene (u svrhu sajmova, javnih manifestacija, parking površina i sl.), izgrađeni i postavljeni na građevinskom zemljištu koje nije privedeno konačnoj namjeni utvrđenoj ovim Planom.

**Član 21.**

Privremenim objektima se smatraju i objekti čija je vrsta i namjena takva da se u njima obavlja privremeno poslovna djelatnost (montažni objekti za prodaju štampe tipa "kiosk", pokretne tezge, rashladni ormari za prodaju pića i sladoleda, telefonske govornice, javni WC-i, ljetnje bašte i drugi slični objekti) koji čine sastavni dio urbanog mobilijara, a postavljaju se na javnim i drugim površinama.

Privremeni objekti iz prethodnog stava, mogu se locirati na javnim i drugim slobodnim neizgrađenim površinama samo ukoliko njihovo postavljanje:

- neće biti u dogledno vrijeme na smetnji realizaciji Regulacionog plana,
- ne narušava estetski izgled okolnog prostora ili ulice,
- ne ometa odvijanje svih vidova saobraćaja (pješački, kolski i stacionarni),
- ispunjava ostale uslove izgradnje propisane ovom Odlukom.

**Član 22.**

Za privremene objekte iz člana 20 i 21. ove Odluke, urbanistička saglasnost se izdaje iznimno i sa ograničenim rokom važenja, odnosno najdalje do privođenja zemljišta konačnoj namjeni.

Urbanistička saglasnost iz stava 1. ovog člana sadrži obavezu investitora da po isteku roka, građevine mora ukloniti i zemljište dovesti u prvobitno stanje, ili stanje utvrđeno urbanističkom saglasnošću, bez prava na naknadu.

Ukoliko investitor ne izvrši obavezu iz stava 2. ovog člana, nadležna Služba će narediti uklanjanje privremene građevine i dovođenje zemljišta u prethodno stanje ili stanje utvrđeno urbanističkom saglasnošću, na teret investitora.

**VI / USLOVI ZA IZGRADNJU POMOĆNIH OBJEKATA****Član 23.**

Izgradnja slobodnostojećih pomoćnih objekata kao što su garaže za osobna kola, nadstrešnice, ljetne kuhinje, šupe za smještaj ogrjeva, alata i slični objekti ne može se odobriti.

Pomoćni objekti u okviru individualne izgradnje treba da se rješavaju u sklopu arhitektonskog rješenja objekta, kako bi građevinska parcela ostala slobodna.

Već izgrađeni pomoćni objekti zadržavaju se do realizacije konačnog urbanističkog rješenja.

**VII / USLOVI I NAČIN UREĐENJA GRAĐEVINSKOG ZEMLJIŠTA****Član 24.**

Izgradnja objekata na obuhvatnom području Plana vrši se na uređenom građevinskom zemljištu.

Građevinskim zemljištem se smatra zemljište koje je u granicama obuhvata Plana

Izgradnja građevina može se vršiti i na neuređenom građevinskom zemljištu, pod uslovom da se njegovo uređenje, shodno uslovima utvrđenim u urbanističkoj saglasnosti, izvrši u toku izgradnje objekta.

U slučaju da za pojedina područja nije donesen program uređenja građevinskog zemljišta, kao minimum uređenja građevinskog zemljišta utvrđuje se onaj obim u kome su izvedeni ili će se uporedo sa izgradnjom objekata izvesti radovi koji obezbjeđuju:

- snabdijevanje vodom za piće
- odvodnju otpadnih i oborinskih voda u skladu sa sanitarno-higijenskim propisima
- priključak na elektroenergetsku mrežu
- kolski i pješački prilaz.

**VIII / USLOVI KORIŠTENJA ZEMLJIŠTA NA ZAŠTITNIM INFRASTRUKTURNIM POJASEVIMA I ZAŠTIĆENIM PODRUČJIMA****Član 25.**

Zaštitni pojas uz saobraćajnice u granici ovog Plana predstavlja prostor od građevinske linije do saobraćajnice, odnosno prostor u kome nije dozvoljena gradnja objekata.

U skladu sa Planom sve saobraćajnice ili njihovi dijelovi moraju imati karakter i elemente gradske ulice.

**Član 26.**

Izgradnja objekata i vršenje drugih građevinskih radova ne može se vršiti na zemljištu, koje je zakonskim odredbama i ovim Regulacionim planom utvrđeno kao zaštićeno.

Zaštitne zone i pojasevi podrazumjevaju:

- zaštitne pojaseve uz saobraćajne pravce,
- zaštitne pojaseve vodovodne, kanalizacione, toplovodne, elektro i ptt mreže,

#### Član 27.

Širina zaštitnog pojasa primarnih vodova vodovodne i kanalizacione mreže iznosi po 5,0m sa obadvije strane, računajući od osovine cjevovoda.

Izuzetno, moguća je izgradnja objekata i na manjoj udaljenosti i na samim vodovima, pod uslovima i na način predviđen u saglasnosti nadležnog komunalnog preduzeća.

Za sve zatečene i planirane objekte unutar granica ovog Plana obavezan je priključak na zajedničku vodovodnu i kanalizacionu mrežu.

#### Član 28.

Zaštitni pojasevi telekomunikacijskih vodova utvrđuju se prema posebnim tehničkim propisima.

Izgradnja primarne i sekundarne telefonske mreže može se vršiti samo podzemno.

#### Član 29.

Zaštitni pojasevi uz trase postojećih i planiranih dalekovoda, utvrđuju se u skladu sa Pravilnikom o zonama sigurnosti nadzemnih elektroenergetskih vodova nazivnog napona od 110 kV do 400 kV (usvojenog od strane DERK-a, februar/2008. godine), kao i Pravilnikom o tehničkim normativima za izgradnju nadzemnih elektroenergetskih vodova nazivnog napona od 1 kV do 400 kV („Službeni list SFRJ“, broj 65/88).

U zaštitnim pojasevima iz prethodnog stava zabranjeno je graditi objekte namijenjene za stanovanje ili boravak ljudi, bez obzira na stepen i sigurnost izgrađenog dalekovoda.

Izuzetno, može se odobriti izgradnja objekata namijenjenih za stanovanje ili boravak ljudi u zaštitnom pojasu dalekovoda, pod uslovima koje odredi nadležni organ Elektroprenos BiH ili nadležna elektrodistribucija u zavisnosti od nazivnog napona predmetnog elektroenergetskog objekta.

### IX / USLOVI ZA POSTAVLJANJE STUBOVA I DRUGIH ELEMENATA URBANOG MOBILIJARA

#### Član 30.

Postavljanje oglasnih stubova, reklamnih panoa i drugih elemenata urbanog mobilijara može se planirati uz kolske i pješačke komunikacije, javne površine, na zabatnim fasadama objekata i sl. uz uslov da ne ometaju funkcioniranje saobraćaja, ulazak u objekat i sl., u skladu

sa važećim zakonskim propisima i odlukama donesenim od strane nadležnih institucija. U pogledu materijala, boje i načina izrade, ove elemente prilagoditi izgledu mjesta, ulice i okoline.

### X / MJERE ZAŠTITE STANOVNIŠTVA I MATERIJALNIH DOBARA OD PRIRODNIH I LJUDSKIM DJELOVANJEM IZAZVANIH NEPOGODA I KATASTROFA I RATNIH DEJSTAVA

#### Član 31.

Radi zaštite stanovništva od ratnih dejstava i elementarnih nepogoda utvrđuje se obaveza obezbjeđenja skloništa i drugih zaštitnih objekata u granicama Regulacionog plana, a u skladu sa „Zakonom o zaštiti i spašavanju ljudi i materijalnih dobara od prirodnih i drugih nesreća (“Sl. novine FBiH”, broj: 39/03, 22/06, 43/10) i u skladu sa posebnim propisima donesenim na nivou Grada.

Zaštita stanovništva i materijalnih dobara od ratnih dejstava ili elementarnih nepogoda, utvrđuje se planom odbrane i civilne zaštite koji se radi u skladu sa važećim propisima i u skladu sa ovim Regulacionim planom.

#### Član 32.

Potrebno je potpuno sprovođenje mjera zaštite od požara utvrđene u operativnom Planu zaštite od požara Grada Zenica sa detaljno utvrđenim mjerama zaštite.

Pored mjera utvrđenih zakonskim i podzakonskim propisima, u postupku izdavanja urbanističke saglasnosti, neophodno je definisati urbanističko - građevinske mjere zaštite koje uključuju:

- da svi objekti budu izgrađeni od čvrstih materijala otpornih na štetne utjecaje ratnih dejstava i elementarnih nepogoda,
- da svi objekti imaju obezbjeđene mjere zaštite od požara, kao i druge zakonski propisane mjere zaštite,
- da se planom odbrane utvrde skloništa osnovne i dopunske zaštite (broj i lokacija).

### XI / MJERE ZAŠTITE PRAVA LICA SA UMANJENIM TJELESNIM MOGUĆNOSTIMA

#### Član 33.

Radi zaštite prava lica sa umanjnim tjelesnim mogućnostima, a u skladu sa odredbama “Uredbe o prostornim standardima, urbanističko-tehničkim uslovima i normativima za sprječavanje stvaranja arhitektonsko-urbanističkih prepreka za lica sa umanjnim tjelesnim mogućnostima” (“Službene novine Federacije BiH”, broj 48/09), neophod-

no je kod izgradnje objekata voditi računa da građevina sa četiri ili više stambenih jedinica, javne ustanove, poslovni i proizvodni objekti i sl., kao i javne površine, moraju biti projektovane i izgrađene na način koji trajno osigurava nesmetan pristup i kretanje osobama s teškoćama u kretanju, kao i da se tokom njihovog korištenja izbjegnu mogućnosti ozljede korisnika građevina.

U postupku izdavanja urbanističke saglasnosti, a u zavisnosti od namjene objekata, neophodno je konkretno definisati uslove izgradnje za potrebe lica sa umanjanim tjelesnim mogućnostima.

#### Član 34.

U građevinama za koje je izdato odobrenje za građenje, odnosno, koje su izgrađene prije donošenja ovog Regulacionog plana neophodno je izvršiti uklanjanje arhitektonskih barijera koje onemogućavaju pristup i kretanje osobama s teškoćama u kretanju u roku koji utvrdi nadležna Služba.

Nalog za uklanjanje barijera iz prethodnog stava, daje nadležna Služba na zahtjev osoba s teškoćama u kretanju ili njenog staratelja, a za uklanjanje barijera, odnosno omogućavanje pristupa građevini i kretanju u građevini osoba s teškoćama u kretanju, odgovara vlasnik građevine, odnosno investitor.

### XII / MJERE SPRJEČAVANJA NEPOVOLJNIH UTJECAJA NA OKOLIŠ

#### Član 35.

##### (mjere zaštite)

U cilju sprječavanja nepovoljnih utjecaja na okoliš, neophodno je obezbijediti sve potrebne mjere, koje po-drazumijevaju sljedeće:

- za sve planirane, kao i izgrađene objekte, potrebno je obezbijediti dovod pitke vode, kao i odvodnju otpadnih i oborinskih voda,
- adekvatno urediti površine za odlaganje otpada na parcelama od strane njihovih vlasnika, u svrhu efikasnog prikupljanja i odvoza otpada od nadležnog komunalnog preduzeća,
- zaštititi zrak, tlo i vodu u smislu zabrane korištenja i ispuštanja otrovnih plinova, prašine, sredstava i slično,
- zaštititi postojeću vegetaciju,
- primijeniti adekvatne zaštitne mjere za postojeće zagađivače locirane na širem području ovog Plana
- druge mjere u cilju zaštite i sprječavanja nepovoljnih utjecaja na okoliš.

### XIII / PRELAZNE I ZAVRŠNE ODREDBE

#### Član 36.

Ova odluka stupa na snagu osmog dana od dana objavljivanja u Službenim novinama Grada Zenica.

Broj: 01-23-12942/16

Zenica, 16.06.2016. godine

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

#### 46.

Na osnovu člana 3. i 4. Zakona o javnim preduzećima u Federaciji BiH ("Službene novine FBiH", br.8/05, 81/08, 22/09), člana 307.,303.i 180. Zakona o privrednim društvima ("Službene novine FBiH", br.81/15), člana 21. tačka 19. Statuta Grada Zenica ("Službene novine Grada Zenica", br. 5/15), Gradsko vijeće Zenice na 16. sjednici održanoj dana 16. juna 2016. godine, donosi

#### ODLUKU

### O IZMJENAMA I DOPUNAMA ODLUKE O USKLAĐIVANJU STATUSA JAVNOG PREDUZEĆA "TRŽNICA" ZENICA SA ZAKONOM O PRIVREDNIM DRUŠTVIMA I ZAKONOM O JAVNIM PREDUZEĆIMA

#### Član 1.

Ovom odlukom vrše se izmjene i dopune Odluke Vijeća Općine Zenica o usklađivanju statusa Javnog preduzeća "Tržnica" Zenica sa Zakonom o privrednim društvima i Zakonom o javnim preduzećima, (Službene novine općine Zenice", br. 8/06, 7/08 i „Službene novine Grada Zenica“ br. 1/16), u daljem tekstu: Odluka.

#### Član 2.

Mijenja se član 16. Odluke i glasi:

“Ukupan kapital preduzeća sa 31.12.2014. god., raspoređuje se na:

- osnovni kapital u iznosu od 3.155.050,00 KM
- zakonske rezerve u iznosu od 1.051.684,00 KM.

U odnosu na osnovni kapital preduzeća prema Rješenju o upisu u Sudski registar br. U/I-979/98 od 02.09.1998. god. (3.819.363,00 KM), osnovni kapital je umanjen za iznos od 664.313,00 KM ali su zakonske rezerve povećane za iznos od 1.051.684,00 KM“.



**Član 3.**

Zadužuje se Komisija za propise da sačini prečišćen tekst Odluke.

**Član 4.**

Ova odluka stupa na snagu danom objavljivanja u "Službenim novinama Grada Zenice".

Broj: 01-01-12939/16

Zenica, 16.06.2016. god.

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

-----

**47.**

Na osnovu člana 7. stav 2. Zakona o izboru, prestanku mandata, opozivu i zamjeni Načelnika općine u F BiH („Službene novine F BiH“, broj 19/08), člana 21. tačka 18. i 33. stav 1. Statuta Grada Zenica („Službene novine Grada Zenica“, broj 5/15), Gradsko vijeće Zenica na vanrednoj sjednici održanoj 27. maja 2016. godine, donosi

**RJEŠENJE  
O IZBORU VRŠIOCA DUŽNOSTI  
GRADONAČELNIKA ZENICE**

**I**

Mr. Selver Keleštura, dipl. pravnik, bira se za vršioca dužnosti Gradonačelnika Zenice do izbora novog Gradonačelnika.

**II**

Ovo rješenje stupa na snagu danom donošenja a objavit će se u "Službenim novinama Grada Zenica".

Broj: 01-01-11906/16

Zenica, 27. 05. 2016.godine

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

-----

**48.**

Na osnovu člana 2.15. stav (2) Izbornog zakona Bosne i Hercegovine ("Službeni glasnik BiH", broj: 23/01,7/02, 9/02, 20/02, 25/02, 4/04, 20/04, 25/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 07/14) i člana 21. tačka 18. Statuta Grada Zenica ("Službene novine Grada Zenica", broj: 5/15) Gradsko vijeće Zenica na 16. sjednici održanoj 16. juna 2016. godine, donijelo je

**RJEŠENJE  
O IMENOVANJU ZAMJENSKOG ČLANA  
GRADSKO IZBORNE KOMISIJE ZENICA**

**Član 1.**

Za zamjenskog člana Gradske izborne komisije Zenica imenuje se Nihad Pašalić, dipl. pravnik iz Zenice.

Imenovani će obavljati i funkciju v.d. predsjednika Gradske izborne komisije Zenica do utvrđivanja rezultata Lokalnih izbora 2016. godine.

**Član 2.**

Ovo rješenje stupa na snagu danom davanja saglasnosti Centralne izborne komisije Bosne i Hercegovine i objaviće se u „Službenim novinama Grada Zenica“.

Broj: 01-01-12879/16

Zenica, 16. juni 2016. godine

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

-----

**49.**

Na osnovu člana 21. tačka 17. Statuta općine Zenica ("Službene novine Grada Zenica", broj 5/15) i člana 37. Poslovnika Vijeća općine („Službene novine općine Zenica“, broj: 2/10) Gradsko vijeće Zenica na 16. sjednici održanoj 16. juna 2016. godine, donijelo je

**RJEŠENJE  
O RAZRJEŠENJU I IMENOVANJU ČLANA  
KOMISIJE ZA PITANJA MLADIH**

**I**

**Blanka Matić** razrješava se dužnosti člana Komisije za pitanja mladih.

**II**

**Anamarija Hrgić** imenuje se za člana Komisije za pitanja mladih.

**III**

Ovo rješenje stupa na snagu danom donošenja i objaviće se u "Službenim novinama Grada Zenica".

Broj: 01- 01-12946/16

Zenica, 16. juni 2016. godine

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

**50.**

Na osnovu člana 21. tačka 31. Statuta Grada Zenica ("Službene novine Grada Zenica"; broj 5/15), člana 13. stav 1. Odluke o organizaciji mjesne samouprave ("Službene novine općine Zenica", broj:1/10) i člana 37. Poslovnika Vijeća općine ("Službene novine općine Zenica", broj: 2/10) Gradsko vijeće Zenica na 16. sjednici održanoj 16. juna 2016. godine, donijelo je

**ODLUKU**

**O DODJELI MANDATA KANDIDATIMA  
ZA ČLANOVE SAVJETA MZ "DONJA  
GRAČANICA"**

**Član 1.**

**Tumbić Alisa** razrješava se dužnosti člana Savjeta MZ "Donja Gračanica", zbog preseljenja na područje druge mjesne zajednice.

**Šarić Samiru** dodjeljuje se mandat člana Savjeta MZ "Donja Gračanica" kao sljedećem kandidatu s najvećim brojem osvojenih glasova po teritorijalnom principu.

**Član 2.**

**Šarić Đenita** razrješava se dužnosti člana Savjeta MZ "Donja Gračanica", zbog neopravdanih izostanaka sa sjednica Savjeta MZ "Donja Gračanica".

**Bošnjak Semrudinu** dodjeljuje se mandat člana Savjeta MZ "Donja Gračanica" kao sljedećem kandidatu s najvećim brojem osvojenih glasova po teritorijalnom principu.

**Član 3.**

**Stupar Ejub** razrješava se dužnosti člana Savjeta MZ "Donja Gračanica", zbog neopravdanih izostanaka sa sjednica Savjeta MZ "Donja Gračanica".

**Kulbegović Samri** dodjeljuje se mandat člana Savjeta MZ "Donja Gračanica" kao sljedećem kandidatu s najvećim brojem osvojenih glasova po teritorijalnom principu.

**Član 4.**

Ova odluka stupa na snagu danom donošenja i objaviće se u "Službenim novinama Grada Zenica".

Broj: 01-01-12947/16

Zenica, 16. juni 2016. godine

PREDSJEDAVAJUĆI  
GRADSKOG VIJEĆA ZENICA

*Nebojša Nikolić, s.r.*

**GRADONAČELNIK****51.**

Na osnovu člana 34. tačka 5. i 6. i člana 117. Statuta Grada Zenica ("Službene novine Grada Zenica", broj 5/15), a u vezi sa članom 29. Zakona o javnim ustanovama ("Službene novine Federacije BiH" broj: 2/92) Gradonačelnik Zenice, donosi

**ZAKLJUČAK**

**O PRODUŽENJU MANDATA DIREKTORICI  
JU "CENTAR ZA SOCIJALNI RAD" ZENICA**

**I**

Nurki Babović, VSS, dipl. sociologinji, iz Zenice, koja je imenovana Rješenjem Načelnika općine Zenica sa danom 21.05.2012. godine ("Službene novine općine Zenica", broj 5/12) na funkciju direktorice JU "Centar za socijalni rad" Zenica, produžava se mandat do okončanja procedure izbora i imenovanja direktora JU "Centar za socijalni rad" Zenica prema odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine FBiH" broj: 34/03).

**II**

Ovaj zaključak stupa na snagu danom donošenja i objavit će se u „Službenim novinama Grada Zenica“.

Broj: 02-49- 11661/16

Zenica, 20.05.2016. godine

GRADONAČELNIK  
*Husejin Smajlović, s.r.*

52.

Na osnovu člana 34 Statuta Grada Zenica ("Službene novine Grada Zenica", broj 5/15) i člana 25. i 28. Statuta Javnog preduzeća "Grijanje" d.o.o. Zenica ("Službene novine općine Zenica", broj 6/08), Gradonačelnik Grada Zenica, u funkciji Skupštine Javnog preduzeća "Grijanje" d.o.o. Zenica, donosi

**ZAKLJUČAK  
O DAVANJU SAGLASNOSTI NA  
IMENOVANJE VRŠIOCA DUŽNOSTI  
DIREKTORA JAVNOG PREDUZEĆA  
"GRIJANJE" D.O.O. ZENICA**

**I**

Daje se saglasnost na imenovanje Bošnjak Elvira, dipl. ing. mašinstva iz Zenice, za vršioca dužnosti Javnog preduzeća "Grijanje" d.o.o. Zenica, a na osnovu Odluke o imenovanju vršioca dužnosti direktora Javnog preduzeća "Grijanje" d.o.o. Zenica, broj: 6939/16 od 19.05.2016. godine, Nadzornog odbora Javnog preduzeća "Grijanje" d.o.o. Zenica

**II**

Zaključak stupa na snagu danom donošenja i objavit će se u "Službenim novinama Grada Zenica".

Broj: 02- 49-11561/16/16

Zenica, 19. maj 2016. godine

GRADONAČELNIK  
*Husejin Smajlović, s.r.*

-----

**MINISTARSTVO ZDRAVSTVA ZE-DO KANTONA**

53.

Na osnovu člana 2. stav 1. Pravilnika o načinu pregleda umrlih, te utvrđivanja vremena i uzroka smrti („Službene novine Federacije Bosne i Hercegovine”, broj 79/13 i 9/14), Ministarstvo zdravstva Zeničko-dobojskog kantona, donosi

**RJEŠENJE  
O IMENOVANJU MRTVOZORNIKA**

**I**

Imenuju se mrtvozornici, odnosno ovlaštteni doktori medicine za obavljanje pregleda umrlih, te utvrđivanja

uzroka smrti osoba umrlih izvan zdravstvene ustanove na području općine Zenica i to:

1. dr Sedžad Delibašić, specijalista urgentne medicine i načelnik službe,
2. dr Ljiljana Parganlija, specijalista urgentne medicine,
3. dr Sanel Hrkić, doktor medicine na specijalizaciji iz urgentne medicine,
4. dr Aida Muhić, doktor medicine na specijalizaciji,

**II**

Zadatak je mrtvozornika da na području općine Zenica vrše pregled umrlih osoba u cilju utvrđivanja nastupa, vremena i uzroka smrti i utvrđivanja okolnosti pod kojim je smrt nastupila.

**III**

U postupku pregleda umrlih i utvrđivanju vremena i uzroka smrti mrtvozornici su dužni da svoje zadatke iz tačke II. ovog rješenja obavljaju po postupku i na način propisan Pravilnikom o načinu pregleda umrlih, te utvrđivanja vremena i uzroka smrti.

**IV**

Mrtvozornici imaju pravo na naknadu za pregled umrlih osoba i pravo na naknadu putnih troškova u iznosu utvrđenom Odlukom o visini naknada za obavljanje pregleda umrlih, utvrđivanja vremena i uzroka smrti osoba umrlih izvan zdravstvene ustanove na području Zeničko-dobojskog kantona („Službene novine Zeničko-dobojskog kantona”, broj: 7/15 i 12/15).

**V**

Ovo rješenje stupa na snagu danom donošenja i objavit će se u "Službenom glasniku općine Zenica"

Broj: 11-37-8707/16.

Zenica, 04.05.2016. godine.

MINISTAR  
*Dr. Dragoljub Brenjo, s.r.*

-----

# SADRŽAJ

## GRADSKO VIJEĆE

- 44. ODLUKU O USVAJANJU IZMJENE REGULACIONOG PLANA „MOKUŠNICE“ ..... 1
- 45. ODLUKU O PROVOĐENJU REGULACIONOG PLANA „MOKUŠNICE“ ..... 2
- 46. ODLUKU O IZMJENAMA I DOPUNAMA ODLUKE O USKLAĐIVANJU STATUSA JAVNOG PREDUZEĆA “TRŽNICA” ZENICA SA ZAKONOM O PRIVREDNIM DRUŠTVIMA I ZAKONOM O JAVNIM PREDUZEĆIMA ..... 8
- 47. RJEŠENJE O IZBORU VRŠIOCA DUŽNOSTI GRADONAČELNIKA ZENICE..... 9
- 48. RJEŠENJE O IMENOVANJU ZAMJENSKOG ČLANA GRADSKE IZBORNE KOMISIJE ZENICA..... 9
- 49. RJEŠENJE O RAZRJEŠENJU I IMENOVANJU ČLANA KOMISIJE ZA PITANJA MLADIH ..... 9
- 50. ODLUKU O DODJELI MANDATA KANDIDATIMA ZA ČLANOVE SAVJETA MZ “DONJA GRAČANICA” ..... 10

## GRADONAČELNIK

- 51. ZAKLJUČAK O PRODUŽENJU MANDATA DIREKTORICI JU “CENTAR ZA SOCIJALNI RAD” ZENICA ..... 10
- 52. ZAKLJUČAK O DAVANJU SAGLASNOSTI NA IMENOVANJE VRŠIOCA DUŽNOSTI DIREKTORA JAVNOG PREDUZEĆA “GRIJANJE” D.O.O. ZENICA ..... 11

## MINISTARSTVO ZDRAVSTVA ZE-DO KANTONA

- 53. RJEŠENJE O IMENOVANJU MRTVOZORNIKA..... 11